

DISSERTATIO INAUGVRALIS MEDICA,

SISTENS

THEORIAM

ÆTATVM

PHYSIOLOGICO-PATHOLOGICAM,

QVAM

VELIFICANTE NVMINIS SVPREMI GRATIA,

RECTORE VNIVERSITATIS MAGNIFICO,

PRÆNOBILI ET CONSVLTISSIMO

DN. TOBIA JAC. REINHARTH,

JCTO, SACRI PALATII CÆSAR. COMITE, JVRID. FACVLT. ASSESSORE,

ET PROFESS. COD. PVBL. ORDIN. CIVITAT. STNDICO

ET CONSVLE,

INCLYTO MEDICORVM ORDINE IN PER-ANTIQA

HAC HIERANA GRATIOSE INDVLGENTE,

SVB PRÆSIDIO

LAVDATISSIMI ORDINIS MEDICI DOMINI SENIORIS,

DN. D. HERMANNI PAVLI JVCHII,

SERENISS. DVCVM SAXO-VINAR. ET ISENAC. CONSIL. AVLIC. ET ARCHIAT.

PATHOL. ATQVE PRAXEOS PROFESS. PVBL. PRIMAR. ACADEM.

CÆSAR. NAT. CVRIOS. COLLEGÆ,

PATRONI AC PROMOTORIS SVI COLENDISSIMI,

PRO GRADV DOCTORIS

SVMMISQVE IN ARTE SALVTARI PRIVILEGIIS

ET IMMVNITATIBVS

RITE ET SOLENNITER IMPETRANDIS,

PVBLCÆ ERVDITORVM DISQVISITIONI SVBMITTET

AVTOR ET RESPONDENS

IGNATIVS Srollich / Silesio-Nissensis,

A. A. L. L. ET PHILOSOPHIÆ DOCTOR, S. S. THEOLOGIÆ

BACCALAVREVS FORMATVS.

DIE XIV. AVGVSTI M DCC XXXIII.

IN AVDITORIO MAJORI COLLEGII MAJORIS, HORIS CONSVETIS.

ERFORDIÆ, Literis HERINGII, Acad. Typogr.

Office of the Medical Director

THE OFFICE

OF THE MEDICAL DIRECTOR

OF THE ARMY

AND NAVY

WASHINGTON, D. C.

1917

1918

1919

1920

1921

1922

1923

1924

1925

1926

1927

1928

1929

1930



DISSERTATIONIS INAUGVRALIS MEDICÆ
DE
THEORIA
ÆTATVM
PHYSIOLOGICO-PATHOLOGICA
PROÆMIVM.



Antea utique est humanæ vitæ fragi-
litas, tamque misera ejusdem con-
ditio, dum ab ortu ad occasum us-
que hominem non nisi calamitati-
bus, laboribus & mille insuper
ærumnis continuo jactari depre-
hendimus, ut vivere nil aliud sit,
quam pati, dolere, mori: Tot enim periculorum genera
(ut PLINII verbis utar *Lib. VII. cap. 50.*) tot morbi, tot
metus, tot curæ, toties invocata morte, ut nullum sit frequen-
tius votum: Natura vero nil hominibus brevitate vitæ præ-
stitit melius. Punctum sane est, quod vivimus, & ad-
huc puncto minus, juxta SENECAM *Epist. 49.* & tamen

in tam angusto temporis spatio plures posuit Natura gradus, variasque ac satis notabiles vicissitudines, corporis nostri fragilitatem ac dispositionem continuam ad corruptionem magis promoventes & accelerantes, quam impediētes. Nam, licet in vastissimo hocce terrarum orbe omnia vicissitudinis plena deprehendamus; in nulla tamen creaturarum in illo occurrentium vigorem & effectum talium mutationum evidentius & exquisitius observamus, quam in homine, qui, sicuti reliquis animantibus perfectione superior; ita quoque numero & diversitate istarum vicissitudinum, si non semper manifestarum, saltem notabiliorum, ac determinatis temporibus mutuo sese excipientium, omnibus viventibus præire solet. Et harum quoque intuitu vita nostra communiter in varias dirimitur *Ætates*, quarum quælibet non solum in statu naturali plane singulares & peculiare actionum quarumcunque mutationes & variationes exhibet, sed & in præternaturali distinctos atque cuilibet fere proprios morbos experitur; adeoque vel ob solam hancce causam utique attentio-rem Medicorum considerationem meretur. Nascimur enim singuli in morbos, & cum crescimus, morborum quoque numerus nobiscum crescit, vita autem successive decrescit, ut hunc omnino, quem vivimus, diem, semper cum morte dividere necesse habeamus. Hinc etiam vix concepti & inchoati embryonis signa, communiter mille matris tædia sunt, nausea nempe, vomitus, tormina, pica & infinita alia morborum tormenta, a quibus vix ullam unquam gravidarum immunem deprehendere licet. In partu dein, quid non metuendum habet

habet tenellus infans a matre, ab imperita obstetrice, a se ipso & postmodum ab aliena nutrice, si forsitan, ut moris nostro ævo est, in eam incidit? E carcere materno dein exclusus, primum vitæ tempus dat lacrymis, atque dein per satis notabile temporis spatium, ob partium debilitatem nec loqui, nec vesci, nec ingredi absque aliorum auxilio novit. Neque tamen teneris adeo membris ullo modo parcunt morbi, quin potius cito adsunt Achores, Hydrocephalus, Siriasis, pluraque alia: Nondum firmatum cibus os Aphthis scatet, lac assumptum à ventriculo revomitur, alvum vexant tormina, caput vigiliæ & pavores, totumque corpus convulsiones torquent. Quando dein in incrementum tendit corpus & in majorem proceritatem assurgit, itidem in plures morborum impingit scopulos, nec unquam justum magnitudinis suæ terminum attingit, nisi per varias mutationes, quæ communiter plures producant ægritudines. Quæ hanc sequitur ætas, quamvis à multis impuritatibus repurgata, acerbos tamen inducit affectus, fere immedicabiles & non raro cum morte tantum mirescentes, Hæmoptyses nempe, Phthises, Vomicae &c. Sic & de iis, qui ad consistentis & virilis ætatis optimos annos pervenerunt, & judicii maturitate totam perfectionis metam adæquasse videntur, mirum ac miserum potius est, quâ celeritate labantur & cum corporis viribus in iisdem animi quoque vigor minuatur. Tandem inclinante ætate sensim obrepit non intellecta senectus, ubi tanto magis tristis & querelis plena agitur vita, ab omnibus deliciis aliena, & vitiis pariter ac morbis innumèris onerata: Languet enim spiritus, cor affligitur,

fligitur, caput concutitur ac vertigine rotatur, perit membrorum vigor, ac ob motus impotentiam Paralysis formidatur & non raro Apoplexia ipsa; alii ingravescente senectute repuerascunt animoque bis pueri fiunt; in aliis vero calculorum tormenta adsunt, diraque Arthritis, aut nodosa Podagra & Chiragra assiduo cruciatu artus affligunt, & quidem tanta cum atrocía & pertinacia, ut nulla arte nulloque medicamine debellari queant; quoniam non antea torqueri desinunt, quam doloris vi & diuturnitate patiendi quoque vitam simul sustulerint. Cum ergo hæ pluresve aliæ intuitu *Ætatum* occurrentes vicissitudines, magnæ utique considerationis sint in Scholis Medicorum, nullusque horum, si modo prudenter conscientia suæ consulere intendit, utilissima hacce doctrina carere queat, nisi tam in cognitione, quam curatione morborum gravissimos & periculosissimos committere velit errores; hinc placuit mihi, pro virium tenuitate ac ingenii modulo, veram *Theoriam Ætatum Physiologico-Pathologicam*, juxta veræ & ingenuæ rationis probatæque experientia fundamenta adumbratam, loco Speciminis inauguralis sistere, cui qualicunque conatui ut ex alto clementissime benedicat Summum Numen, ardentissime nunc precor vo-
veoque.

SECTIO PRIOR.

THEORIAM PHYSIOLOGICAM ÆTATUM EXHIBENS.

§. I.

Non lubet equidem latius evagari & statim in limine hujus tractationis diutius critica vocabuli *Ætatis* evolutioni

lutioni immorari, ne forsitan levioribus hisce nimium intenti, alia magis utilia & necessaria prorsus negligamus; licebit tamen paucis, antequam ad realia progrediamur, præmonere, quod vocabulum illud non inepte a Græco *αἰών* deductum esse videatur, quod alias *Ævum* designat, (quo ipso nomine inter alia etiam *vita* ejusque certum spatium indicatur;) ab *Ævo* vero dein *Ævitas*, tandemque ab hac voce, rejecta media syllaba, nobis adhuc usitatum illud, *Ætas*, originem suam duxisse reputetur. Cum vero insuper hæc ipsa vocula etiam vario sensu accipiatur, & modo in genere certam temporis mensuram denotet, modo pro mundi ætatibus, seu ita dictis *Epochis*, vel etiam pro spatio centum annorum, seu *Seculo*, nec non pro parte aliqua *Seculi*; interdum pro *tota hominis vita*, quæ significatio dein omnes speciatim ita dictas ætates simul includit, & tandem pro *certo vitæ spatio* sumatur; hinc tribus saltem verbis indicasse sufficiet, nos non nisi hanc ultimam significationem, quam Græci per vocabulum *ἡλικία* exprimunt, nostram facere, eaque propter dum specialissime de *Ætatibus hominis* jam nobis sermo erit, per eas proprie *certas vitæ periodos*, in quibus *tota hominis constitutio*, non solum respectu *vitalium & moralium functionum*, sed & intuitu *mixtionis fluidarum & texture solidarum partium*, evidentem & notabilem quandam subit mutationem, intelligere.

§. II.

Solent autem communiter Auctores variis modis *Ætates* inter se distinguere, prout nimirum vel generaliore, vel specialiore de iisdem sibi formant conceptum: Generaliter enim aliqui cum GALENO Lib. II. de Temperam. cap. 2. triplicem saltem admittunt earundem divisionem, inter *statum* nempe *Incrementi*, *Vigoris* & *Decrementi* hosque diversos status sibi quoad durationem ita æquales esse reputant, ut tot sint anni incrementi, quot vigoris, totque anni vigoris, quot decrementi; unde, si cuivis statui tribuantur e. g. anni 25. resultat equidem exinde numerus 75. annorum, utpote terminus medius inter 70. & 80. annos, quos tanquam extremum vitæ nostræ terminum sacre Literæ adducunt; minime ta-

men

men propterea hæc ipsa ætatum periodus absolute pro ultima & infima habenda erit, quin potius specialiori dispensationi Divinæ eandem unice relinquendam, & solummodo pro maxime probabili ad interim assumendam, simul vero etiam cuilibet in re tali, quæ non de fide est, liberrimam sentiendi facultatem merito concedendam esse judicamus. Conf. De-thardingii Dissertatio de *Necessitate Medicinæ ex natura termini vitæ*, Anno 1719. Rostochii habitâ.

§. III.

Quod autem ad specialem Ætatum divisionem attinet, litigant equidem adhuc magis inter se, tam Physici, quam Medici, variaque producunt singularum periodorum schemata, variis fundamentis superstructa, facile tamen ex iis illud, quod ordini Naturæ magis consentaneum est, quilibet eligere poterit, si modo circumstantias inferius adducendas cum grano salis pensitaverit: Communissima & simplicissima harum divisionum est illa plebis, quæ juxta vulgo ita dictam *Scalam decempedam* dirigitur & numero denario ordinarie adstricta deprehenditur, unde dein πολυδρόλλητον illud prognatum: *Sehen Jahr ein Kind, zwanzig Jahr ein Jüngling, &c. &c.* quæ vero, quoniam & rationi & experientiæ prorsus contraria est, nullum propterea inter eruditos meruit assensum, suisque amatoribus & fautoribus merito relinquitur. Econtrario vero ARISTOTELIS Auctoritas, qui tria tantum discrimina ætatum constituit, *pueritiam* nempe, *juventutem*, seu floridam ætatem, & *senectutem*, complures eruditos in suas traxit partes, quod nimirum non nisi tres insigniores mutationes in vita hominis occurrerent; ad quos & illi referendi erunt, qui ætatum tempora cum plantarum fatis comparant, & ad instar prioris à GALENO introductæ distinctionis, in *incrementum*, *consistentiam* & *decrementum* vitam distribuunt; æst cum nimis generalis sit triplex ista periodus, ad minimum in alias minutiores dividenda, merito eandem hic omittimus.

§. IV.

Ad medicos usus paulo magis quadrat PYTHAGORÆ quaternaria distributio ætatum, qui nimirum vitam in *pueritiam*,

tiam, juventutem, virilem ætatem & senectutem divisit, licet hoc parum attendamus, quod insimul hanc quadripartitam varietatem cum quatuor anni temporibus singulari quadam proportionem comparaverit, quoniam melius nobis suppetit fundamentum, inferius allegandum, quod heic supponi potest. Quodsi etiam cuidam placuerit prædictas hasce quatuor periodos ulterius adhuc dirimere, & primam dividere in *infantiam & pueritiam*, alteram in *pubertatem & adolescentiam*, tertiam in *ætatem vigentem*, seu *virilem stricte dictam & consistentem*, & quartam in *vegetam & consummatam senectutem*, ille quoque, salvo isto quaternione, id facere eoque ipso insimul varias circa hanc Theoriam occurrentes circumstantias forsitan clariores reddere poterit.

§. V.

Alii denique adhuc majori cum ratione singula vitæ lustra juxta septenarium numerum, aliis quoque in rebus sacrum, dividunt, quorum ante signanus procul dubio HIPPOCRATES est, qui in *libr. de ætat.* in septenario numero ætatem hominis totam contineri primus asseruit, quæ ipsa divisio, quoniam ordini Naturæ quam proxime accedit, etiam nobis præ priori arridet: Solet enim providum hoc corporis nostri principium vitale septenarium huncce numerum plerumque in motibus notabiliorei cuidam usui dicatis exquisite observare & applicare, prout hoc liquido apparet non solum ex consueto menstruo fluxu, ordinarie elapsis quater septem diebus recurrente; sed & ex ipsis motibus & excretionibus criticis, variorum morborum solutionibus destinatis, siquidem in febribus acutis semper fere observamus, quod Natura, principalis illa morborum medicatrix, nisi forsitan incongruis auxiliis turbata fuerit, quolibet septimo die, donec plenarie subjugaverit id, quod corpori inimicum videbatur, criticas materiæ peccantis morbificæ excretionem moliatur, reliquis autem diebus circa ejus præparationem occupata sit, exceptis saltem peracutis morbis, in quibus quia materiæ malignitas celerem sui subjugationem exposcit, utique citius equidem criticam ejus excussionem moliri cogitur, nec tamen intra aliam, quam se-

mi-septenariam ad minimum periodum negotium hocce absolvere conatur.

§. VI.

Quam denique SOLON, Atheniensium Philosophus, quondam protulit Ætatum divisionem in *septem periodos*, ea pariter non modo passim Medicis, sed & ipsis Astrologis placuit, quippe qui exinde occasionem nacti sunt, ut singulis periodis aliquem Planetam & hujus regimen adscripserint, v. g. infantiae *Lunam*, pueritiae *Mercurium*, adolescentiae *Venerem*, juventuti *Solem*, virili ætati *Martem*, senili *Jovem* & decrepitae *Saturnum*; hinc, licet horum nobis non arrideant nugæ, priorem tamen illam ætatum distinctionem in septem periodos modo allegatas commodissime retineri posse putamus, cuilibet tamen liberum relinquentes, an forsitan cum aliis adolescentiam adhuc in annos pubertatis & proprie ita dictam adolescentiam, senectutem vero in crudam, maturam & decrepitam dirimere, hacque ratione decem ætatis species formare velit. Quod autem harum periodorum limites attinet, *infantia*, utpote ætatum omnium prima, ordinarie primum quoque explet septenarium, quo elapso communiter dentes excidunt, novique iterum progerminant. *Pueritia* extenditur usque ad finem secundi septenarii, ubi signa *pubertatis* ingruunt, atque in maribus semen secerni, in foemellis autem mensium fluxus prorumpere solet, quæ intra semi-septenarium plerumque sese manifestant, ita ut post decimum septimum annum incipiat proprie ita dicta *adolescencia*, quæ dein post annum XXIV., cum fine incrementi in longitudinem, etiam desinit, ejusque in locum *juventus* ingruit, quando nimirum cessante augmentatione in longitudinem, corporis partiumque crassities magis augescere incipit, id quod per septenarium cum dimidio durat, nempe usque ad sextum septenarium, quo tempore *virile robur* sese sistit, & corporis atque animi vires debitam *ætatem* attingunt, quæ dein durante *consistenti ætate*, per septimum nempe septenarium, seu usque ad annum XLIX. in eo gradu & statu conservatur; postmodum autem successive decrescit & sic tandem *senectus* incipit, quæ, quia octavo septenario non admodum notabilia infert incommoda, merito *viridis*

vidis vocatur, succedente dein *maturâ senectute*, quam plura magisque exquisita comitantur incommoda, usque ad finem noni septenarii, ubi dein omnia vacillare incipiunt consuetusque vigor eximie remittit, unacum corporis valetudine marasmode morbidaque debilitate, quam decrepitam vocamus *senectutem*, cum anno sexagesimo tertio nimirum ingruentem & usque ad ultimum vitæ finem durantem.

§. VII.

Præmissis ergo generalioribus hisce fundamentis ad specialiora nunc progredimur, cujusvis nempe periodi notabiliores circumstantias physiologicas, seu conditionem status naturalis, juxta hunc ordinem lustraturi ac delineaturi. Extenditur autem ordinarie *prima ætas*, quam Græci *ἀνένησις* vocare solent, quoniam nempe continet statum incrementi hominis, quo hic sibi soli vivere solet, a prima nativitatis hora usque ad annum decimum quartum, simulque subdividitur in *infantiam* & *pueritiam*: Novem enim illi menses, per quos foetus humanus in uteri materni latebris delitescit, in numerum ætatis minime venire solent, licet per illud temporis spatium itidem mutationes quædam, roboris incrementis testes, contingant, videlicet motitationes illæ quinto ingravidationis mense observandæ, conatus elisorii sub septimo interdum mense occurrentes, &c. Quoniam vero hoc ipso tempore plenarium complementum fabricæ corporis adhuc deest, hinc ætati illud hodie non annumeratur, sed potius ipse partus pro primo ejus termino meritò constituitur.

§. VIII.

Est autem *infantis ætas* omnium innocentissima, & simul primis præcipue temporibus, impotentissima, eoque ipso luculentissimum imperfectionis nostræ & miseriarum, quibus meritò, post tristem Protoplastarum lapsum, plectimur, documentum præbet: Vivit enim infans ex claustris Uteri egres-
sus, ast ab initio vix vitam plantæ exsuperat, quoniam tenerima membra, ob summam fibrarum flacciditatem, ad paulò exquisitiorem motum subeundum prorsus inepta sunt, statimque delassantur, loquela deficit, sensuum mira hebetudo con-

currit, & omnium, quæ ipsi contingunt, quin & sui ipsius, ignarus esse solet. Postmodum successive crescit vigor Naturæ, quippe quæ in roborando & perficiendo corpore admodum activam & sollicitam se ostendit, adeo, ut vix elapso anni dimidio, statim arduum illud moliatur opus, promotionem nempe eruptionis dentium in alveolis hætenus delitescentium, quæ ipsa communiter sub molestissimis pathematibus procedit, ut gravissime interdum ægrotent & non pauci, inprimis teneriores, accedentibus motibus convulsivis præmature admodum fato e vivis eripiantur. Confer. HIPPOCRATIS *Aphor.* 25. Sect. III. Aliquando equidem infantes dentibus aliquot jam jam instructi in lucem prodeunt, & hi communiter singularem quandam animi vivacitatem exhibent, sed rarius hoc contingit, & præsertim in iis, qui ex Heroum familia geniti sunt, observatur, quemadmodum tale quid de *Ludovico XIV.* Galliæ Rege, notum est, nec non de *M. Curio & Papyrio*, Ducibus Romanorum, item de *Valeria* refertur à *PLINIO* in *Hist. nat. Lib. VII. c. 16. & 17.* Confer. etiam *HILDANVS* *Epist.* 68. *SCHENCKIUS* *Lib. I. Obs.* 380 & 407. *RHODIVS* *Cent. I. Observ.* 92. aliique. Rarissimum autem est infantem omnibus dentibus instructum ex Utero egredi, uti hoc *JOH. ROSSVS* *Warwic.* de *RICHARDO II.* Angliæ Rege testatur. Confer. *A. N. C. Dec. II. Ann. IV. Obs.* 28 Sicuti autem negotium hoc dentitionis aliquando citius peragere & quasi anticipare solet Natura; sic non raro quoque diutius illud differri & serius institui observatur, prout Historiæ in *A. N. C. Dec. I. Ann. 9. & 10. obs.* 112. & *Dec. II. Ann. IX. Obs.* 52. & 212. testantur. Quin imo curiosum admodum est, quod in senibus vivacioribus non solum unus aut alter, sed complures dentes, in locum antea amissorum prodeant, ipsique hac ratione, redeunte quasi pristino robore juvenili, rursus dentiant, cujus rei admodum notabilia apud *GASSENDVM* *Sect. III. Membr. post L. 13. c. 2. pag.* 592. & in *A. N. C. Dec. I. Ann. 9. & 10. Obs.* 134. & 171. *Dec. II. Ann. III. Obs.* 15. & *Ann. IV. Obs.* 28. prostant exempla, ex quibus liquet, quod de genuino tam eruptionis, quam casus dentium termino, nihil certi statui queat.

§. IX.

Peraçto dein & rite absoluto dentitionis opere, alios dein labores in hac ætate suscipit provida Natura, & quidem primo firmatis undique fibris ac in dies adaucto robore partium, organa loquelæ dicata perfectiora & aptiora ad hoc munus obeundum reddere annititur, quo & cum aliis animi sui sensa communicare discat infans, quod qua ratione & modo potissimum fiat, ingeniose tradit PETR. REGIS in *Syst. Philos. L. VIII. P. I. C. 9.* Insuper etiam tunc gressus tentare & ad ambulandum sese accommodare studet tenera hæc ætas, quod quidem, ob teneriorem & debiliorem adhuc ossium substantiam, quæ corpusculi hujus molem difficulter sustinere valet ab initio ægre admodum succedit, ut peregrino quodam fulcimento subinde opus habeant, donec habiliores facti, anno circiter ætatis tertio vel quarto, majori vigore & confidentia undique obambulare queant; & intra hoc spatium insimul quoque structura corporis æqualiter magis perficitur, caput proportionatam magnitudinem nanciscitur, cranium magis magisque induratur, futuræ antea dehiscentes arctius coeunt & firmitus sibi invicem implicantur, inprimis autem hiatus ille triangularis, *Fontanella* dictus, coalescit, ligamenta membranacea tenaciora evadunt, pluresque cartilagine in ossa indurantur, quæ omnia auctioris nutritionis exquisitissima solent esse confectionaria.

§. X.

Quemadmodum ergo Architectus domum minus exstructam minimè onerat mercibus, antequam debite exstructa & convenientibus fulcimentis roborata est: Sic & principio illi vitali, quod sufficienti notitia, corpus humanum struendi, præditum est, utique competit, ut hanc ipsam artificiosissimam machinam, in varios suos usus abhinc adhibendam, debito vigore & robore prius instruat, id quod etiam per primos annos ordinarie fieri solet. Hinc nulla fere operatio in toto corpore tunc temporis magis viget, quam nutritionis actus, siquidem tribus aut quatuor primis ætatis annis pusillum antea foetus corpusculum in tantam excrevit

molem, ut ARISTOTELES *Lib. I. de Generat. Anim. cap. 18.* hominem quinquennem dimidium altitudinis, quam reliquo tempore consecuturus est, adeptum esse judicet, ex quo concludere licet, quod homo, si paucos solummodo annos proportionata energia augmentetur, certissime in monstrosam & giganteam excrescere valeat molem. Quoniam vero copiosa nutritio etiam copiosum exigit succum nutritium, hinc necessario quoque infantes copiosiori indigent alimento, juxta HIPPOCRATIS *Aphorismum 14. Sect. I.* adeoque præstat infantes in primis annis nimis satiari, quam minus: Observamus enim quod omnes illi actus, ad hunc scopum præcipue spectantes, hoc ipso tempore præ aliis valeant; viget nempe appetitus, ut illa ingerantur, quæ non solum ad nutritionem, sed & augmentationem faciunt, quod consuetudo infantum ἀδρφαγεία testatur; concurrit etiam prompta ciborum assumptorum in ventriculo resolutio, heterogeneorum cum illis simul remixtorum exquisita segregatio, & tandem retentorum laudabilium proportionata distributio, de quibus omnibus exactissimum præbet testimonium incrementum corporis sub hac ætate læte in dies surgens.

§. XI.

Sub his autem circumstantiis, dum nimirum Lympha in copia paulo majori intra M. S. deferitur, ipse sanguis utique tenuis admodum & fluxilis redditur, insimulque fibræ magis flexiles & turgidæ evadunt, quod habitus corporis pariter laxus, porosus & mollis sufficienter demonstrat, eaque propter etiam sanguis per patentiora fibrarum oscula expedite movetur ac circulatio ejusdem liberrime succedit, unde pulsus moderatus & æqualis, simul tamen etiam quodammodo languidus esse solet, ne nimirum humor iste gelatinoso-mucido-aquosus, in laxam & debilem texuram impetuosè progrediens, perniciosos infarctus aut stases producat, aut necessariam particularum nutritiarum appositionem prorsus impediat. Inde etiam est, quod hujus ætatis subjecta calore tantum moderato ordinariè gaudeant, ob fibrarum nempe elasticitatem mi-
no-

norem & sanguinis per interstitia ipsarum transitum debiliorem abinde simul dependentem.

§. XII.

Sicuti autem intuitu horum modo allegatorum phœnomenorum in Oeconomia vitali infantum omnia libere, satis prompte & vegete succedunt, nullusque vel obstructionis, vel infarctus, ita seos aut corruptionis qualiscunque metus principio vitali incutitur: Ita & in moralibus actibus eandem quoque tranquillitatem in subjectis hisce deprehendimus, sub qua simul suaves admodum sunt, offensionis non ita memores, nec propositi tenaces, nullisque fere de rebus solliciti; periculo autem imminente, de imbecillitate sua satis convicti, trepidant statim & facile in maximas angustias, imo exinde dependentes gravissimos motus convulsivos, præcipitantur, eaque propter inprimis terrores, tam veri, quam ficti, ipsis plerumque infensissimi & periculosissimi esse observantur. Præterea etiam somnolenti magis sunt, partim ob prædictam illam animi securitatem, partim ob frequentem ciborum ingestionem. Intellectus autem, ob flaccidam nimis & humidiores cerebri constitutionem, fere sepultus adhuc est, vigente interim magis memoria, quoniam hæc ætas, libera magis a curis, facile, quicquid offertur, recipit & retinet, unde etiam recte SENECA, *primum quod ætas invadit*, esse memoriam, asseruit. De reliquo *Temperamentum*, quod in hac & subsequenti ætate potissimum regnat, *Sanguineum* inprimis esse, succulentus ille corporis habitus, faciei venustas, vasorum sanguiferorum minor diameter, moderatus calor, membrorum agilitas & ipsa tandem accretionis indoles, sufficienter demonstrant.

§. XIII.

Circa finem hujus ætatis, elapso nempe primo septenario, notabilis quædam mutatio plerumque occurrit, dum primores dentes, quæ durante lactatione generati ac protrusi fuerunt, & abinde *lactei*, germ: *die Milch-Zähne*, vocantur, tanquam infirmiores, iterum excidunt ac novi & durabiliores eorum in locum prodeunt, hocque tempore *Pueritia*, usque

que ad secundi septenarii complementum sese extendens, suamque denominationem forsitan a *puritate*, quoniam innocens & impuræ libidinis adhuc inscia solet esse hæc ætas, sortita, initium suum sumit. Ista autem dentium permutatio tunc plerumque satis ordinate succedit, dum nempe primo incisores, dein canini, & interdum proximi his molares, excidunt; reliquos autem posteriores molares fere semper immutabiles esse, per experientiam constat. Interdum etiam negotium hoc renovationis dentium, pariter uti prima dentitio, serius differtur, usque ad pubertatis fere terminum, notante EVSTACHIO *Lib. de dent. cap. 29.* Neque etiam sub hoc actu totus dens cum radice sua ex alveolis elabitur, sed solummodo portio superior albicans foras prominens ab inferioribus successive sese elevantibus propellitur, ut deinde vel sponte decidat, vel minimo labore evellatur, alias enim nulla plane speranda esset regeneratio.

§. XIV.

Præterea etiam sub hac annorum periodo fibræ partium musculosarum sensim solidiores & magis elasticæ evadunt, hacqueratione transeunti sanguini magis reluctantur, & eundem simul fluidiorem ac paulo subtiliorem, cum augmento motus intestini & abinde dependentis caloris naturalis, reddunt, præprimis cum insuper quoque agile puerorum vitæ genus, continui fere motus & exercitia corporis, accedant, quibus non parum adjuvatur hic effectus, insimulque feri habituosi notabilis portio per laxam satis structuram cutis expellitur, particulæ autem salino-sulphuræ magis exaltantur, ut ita ratione crasseos optimus evadat sanguis, & ob ejus intimiorem aditum intra extremam corporis peripheriam facies florida, rosea, ac reliqua membra rubentia, tepida & ad tactum mollia appareant. Pulsus sub his circumstantiis itidem moderatus, æqualis & ab omni impetu alienus est, quoniam sanguis liberrime & expedite progrediens vehementiori motu non indiget, nullusque principio vitali incutitur metus obstructionis cujusdam, nec etiam ullum turbandæ sanguinis mixtioni impendet periculum, quapropter ejusmodi
sub-

subjecta quoque in actionibus moralibus securitati magis indulgent, animique placidi, alacris, hilaris, petulantis, sed simul tractabilis, otiosi ac voluptuosi sunt: Ob intellectus autem qualemcunque adhuc immaturitatem, creduli nimis, incauti, minusque judiciosi sunt, memoria autem tanto magis excellunt, adeoque ad erudiendum tunc sunt aptissimi. Aliquando etiam ingenium quasi divinum admodum præmaturre in hac ætate ostendunt, hacque ratione, si fida & solerti manu ductione illud simul magis excitetur, sæpissime brevi temporis ambitu eruditionem insignem acquirunt, omniumque admirationem in se rapiunt, ast, quod præcipue dolendum, rarissime ad maturiorem ætatem deveniunt, quin potius, facis lucidissimæ simul tamen cito deflagrantis ad instar, brevi iterum extinguuntur & evanescent, prout hoc exempla in *Actis Erudit. Lipsiens. Anno 1683. Mens. Septembr. p. 388. FREHERI Theatro Viror. Clar. Part. I. pag. 1539. & Annalibus Med. Phys. Wratislaviens. Ann. 1724. M. Januar. Class. VI. Art. 3.* occurrentia, satis notabilia sufficienter demonstrant, simul vero etiam exactissimum argumentum præbent, non nisi unum esse in corpore principium, quod illud movet, nutrit, conservat, &c. quoniam nimirum infantes & pueri tales præcoces, quantum ingenio excellunt, tantum corporis proceritate & robore, imo etiam duratione vitæ deficiunt.

§. XV.

Secunda ætas, Juventutem exhibens, postmodum initium sumit absoluto altero annorum septenario, simulque *Pubertatem & Adolescentiam*, sub se comprehendit. *Pubertas* autem, Latinis à pube, seu lanugine circa pubem & pudenda tunc prodeunte, Græcis *ἡβη* dicta, breviori circumscripta est termino, siquidem tantummodo semi-septenariam periodum comprehendit atque anno decimo septimo cum dimidio iterum ordinarie finitur. Variat equidem initium pubertatis, dum alii citius, si nempe activioris indolis & temperamenti sunt, in locis magis meridionalibus degunt & sub diæta lautiori vinosa & aromatica versantur; alii vero serius pubescunt, si frigidioris & segnioris sunt constitutionis in regionibus ver-

sus Septentrionem magis spectantibus habitant, ab alterius sexus consortio remoti solitarie vivunt, & sub graviore laborum onere crudiorque diæta continuo versantur, nisi forsitan personalis idiosyncrasia impedimenta ista exsuperet. Legitimus vero & hodiedum adhuc usitatus pubertatis terminus est annus decimus quartus, qui etiam à Jctis observatur in maribus, prout ex *Instit. Justin. Quib. mod. tut. fin. § L. 3. Cod. q. tut. v. cur. constat.*

§. XVI.

Solenniores autem illæ mutationes in hac ætate ordinarie occurrentes, unice negotium generationis, seu potentiam tum generandi, tum concipiendi individuus conciliandam, spectant, adeoque etiam satis notabiles tam animi, quam corporis, inprimis autem organorum adhuc actum spectantium illo tempore observandæ sunt alterationes. In sexu nimirum potiori, aucto paulo magis sanguinis circulo & calore naturali, insolitus antea orgasmus in toto corpore frequentius percipitur, partium tonus & robur exaltatur ac fibræ ipsarum hætenus debiliores & laxiores magis obfirmantur, insuper etiam humores lymphatico-salivales circa caput & collum secreti & collecti copiosius versus vasa spermatica diriguntur ac deferuntur, ut hæc ipsa amplientur & liquoris hujus ad generationem adeo necessarij præparati adjuvetur & promoveatur; hinc etiam interior asperæ arteriæ superficies, humoribus hisce destituta, siccior evadit, eaque propter vox antea clara & sonora nunc in raucam & inæqualem convertitur, quod HIPPOCRATES *Lib. VI. Epid.* & ARISTOTELES *Lib. VII. Histor. animal. cap. I. τρυγίζειν*, seu *hircitare* vocant, quæ ipsa phrasis a quibusdam Autoribus de singulari quodam subjectis hisce familiari, quasi tunc hircum redolere inciperent; ab aliis de libidine, hircorum ad instar in iisdem tunc sese exferente; aliquando etiam de lanugine in genis & mento prorumpente, quoniam vocabulo *τρυγίς* antiquiores Medici loca corporis humani pilis leviter obsita designare solebant, interpretatur; nobis vero de voce tunc temporis quasi caprizante aut hircitante potius intelligenda esse videtur, quæ tamen
brevis

brevi intervallo postmodum iterum planior & æqualior redditur, quando nempe, prædictis organis ad debitam perfectionem deductis, nunc sanguis æquali & placido motu propellitur, orgasmum cum calore antea intenso remittit ac eo ipso interior tracheæ superficies unacum aliis partibus debite quoque humectatur & lubrica redditur. De reliquo singulæ hæ mutationes sub peculiari quodam voluptatis sensu communiter subjectis hisce eveniunt, dum nempe virile semen in vasculosa testium substantia elaboratum & secretum, dehinc in epididymidum tabulos promotum & tandem per vasa deferentia vesiculis seminalibus communicatum, talem utique ætati huic, cæteroquin in moralibus adhuc imbecilli, infert pruritus & æstus venereum, ut ægre admodum intra castitatis limites coerceri queat. Insuper quod sub auctiori & vehementiori illo sanguinis versus testes affluxu insimul transpiratio ibidem intenditur, adeoque non solum hæ ipsæ partes tunc copiosius sudant & materia quædam mucosa-olida & nidorosa iisdem circumfusa apparet, sed & pili ibidem prorumpentes indies magis expanduntur, id quod etiam sub axillis, pariter udore ejusmodi uliginoso tunc scatentibus contingit, quemadmodum etiam prima barbæ rudimenta tunc apparere incipiunt, quæ in lanugine, hisce annis tantum labium superius obsidente, postmodum tamen latius sese expandente, consistunt, donec tandem singulare hoc virilis gravitatis signum, elapso circiter quarto septennio plenariam suam perfectionem acquirat.

§. XVII.

Quod sepuiore sexum attinet, in eo, appropinquante pubertatis termino, Natura unice fere ad futuram tandem aliquando foetus conceptionem & nutritionem sese præparare solet, eumque in finem paulo majorem sanguinis copiam colligit ac circa Uterum imprimis congerit, ut dein tanto facilius gravissimum huncce actum absolvere queat. Ne vero ista abundantis sanguinis quantitas interim qualecunque periculum aut damnum Oeconomix vitali afferat, prudenti consilio excretionem aliquam periodicam ejusdem per prin-

cipale illud generationis organon hoc tempore molitur, & ut plurimum perficit, singulisque mensibus (excepta in plerisque graviditate & lactatione,) constanter & assidue repetit, donec terminus ille, intra quem ad generationem ordinarie apta sunt talia subjecta, elapsus sit. Licet autem primam hujus menstrui fluxus eruptionem non raro citius, vel etiam serius contingere videamus, legitimus tamen & usitatissimus ejusdem terminus initium pubertatis, aut secundi septenarii finis esse solet, quo tempore plerumque puellæ tales insolitum in sanguine persentiscunt Orgasmm, cum variis aliis incommodis conjunctum, quoniam motu ejus versus vasa hypogastrica directo, sanguis superfluus ad Uterum ejusque vaginam congeritur, ut postmodum per insolitas antehac vias exterminetur, id quod vero, ob minus expeditam viarum permeabilitatem, plerumque admodum difficulter, & prima hac vice non sine doloribus, imo nec sine insigni animi consternatione, ob insolitæ hætenus rei præsentiam, contingit, pluraque alia satis molesta symptomata, ex Pathologia jamjam cuilibet nota, tam ante, quam post eruptionem illam, simul inferre solet. Præterea etiam Mammæ, quæ visum hætenus, apparente non nisi papillulâ, effugerant, sub singulari libidinis cujusdam sensu, successive attolluntur, ut malorum figuram quasi referant, dumque dein subjecta talia exinde suam ad actum conjugalem acquisitam aptitudinem hariolantur, ac tali ornamento se insimul dotata cernunt, plerumque Veneris incitamentis admodum divexantur & excruciantur, imo quandoque a Lympha in Clitoride & ipsis vaginæ glandulis stabulante adeo ad libidinem proritantur, ut etiam ex amore prorsus insaniant, cujus furoris uterini optimum remedium dein voluntatis adimpletio esse solet. De reliquo equidem barba in puellarum talium mento non solet prorumpere, quoniam non tam gravitatis, quam amoris plenam faciem consequi debent, ipsarumque suavis formositas hac ratione maxime obfuscaretur; aliquando tamen ex singulari Naturæ oberrantis ludibrio etiam hæ, tanto frequentius autem vetulæ, in signum ineptitudinis ad concipiendum, bar-

barbam satis prolixam itidem exhibent, qualia exempla sat numerosa in *A. N. C. Dec. III. Ann. 5. & 6. Obs. 283. Dec. II. Ann. V. Obs. 48. Dec. I. Ann. 9. & 10. Obs. 95. & in Annalibus Med. Phys. Wratislav. Ao. 1724. Mens. Jul. Class. IV. Art. 7. prostant.*

§. XVIII.

Adolescentia dein, ab adolescendo ita dicta, quoniam sub hac ætate homines ad debitam deveniunt staturam, corpusque in longitudinem ulterius excreſcere deſinit, orditur ab anno decimo ſeptimo cum dimidio, totumque annorum ſeptenarium complectitur, adeoque uſque ad vigefimum quartum annum durat. Comparatur hæc ætatum periodus, ob calorem moderatum, quo ordinarie pollet, non inepte cum æſtatis initio, quod, ſicuti omnium ætatum optima merito reputatur, eaque propter *grata* vocatur *ætas*, quoniam ſub eadem nimia puerorum humiditas conſumta, calor verò non adeo vehemens eſt, ut in præcedente: Habitus enim corporis paulo ſtrictior & fibræ magis elæſticæ tunc apparent, unde ſanguis per arctiora harum interſtitia paulo majori cum virtute transprimitur, ſicque magis inſimul ſubtiliſatur & attenuatur, quapropter etiam pulſus, qui huic viarum anguſtiæ proportionatus eſſe debet, communiter magnus, & ob ſummam ſanguinis fluiditatem ſat vehemens exiſtit, adeoque non injuſte exinde concludere licet, quod durante hac ætate Temperamentum Sanguineo-Cholericum magis prævaleat. Inde ergo eſt, quod ejusmodi ſubjecta, quoniam Naturæ in actibus vitalibus ſumma conceſſa eſt libertas, animi admodum hilaris & alacris ſint, prompta ad agendum, voluptuoſa, ad perpetranda ſcelera & vindictam exequendam admodum prona, præprimis autem miræ ſagacitatis in exequendis concupiſcentiis carnalibus. Denique quod internos ſenſus, vigent in iſſis præcipue memoria & ingenium, unde res ſenſibus ſuſceptas promptiſſime percipiunt, ſimulque ad differendum paratiſſimi ſemper ſunt: Inſuper etiam intellectus majores in dies capit vires, adeoque etiam, omiſſis puerilibus, ad ſerîa animum magis applicant, unde etiam dentes molares poſtici, qui ſub hujus ætatis finem circiter prorumpere ſolent, non

inepte *Sapientiae dentes* vocantur, quoniam hoc tempore intellectus unacum judicio crescere & magis obfirmari deprehenduntur.

§. XIX.

Sub tertia ætate, quam virilem vocant, principium vitale plerumque occupatum est in roborando corpore, acue-
dis sensibus & promovenda generandi facultate, ut ita sub-
jecta, quæ hætenus sibi tantum vixerant, aliis quoque vivere
incipiant, id quod a septenario tertio cum dimidio usque ad
finem septimi durare solet, hacque ratione pariter septena-
rios tres cum dimidio sub se comprehendit, quo tempore
dein vires notabiliter iterum decrescere & reliquæ functiones
magis interpellari observantur. Dispersimus autem hanc
ætatem merito in *vigentem*, sub qua nimirum robur virile sese
potissimum exserere incipit, & *consistentem*, ubi illud obfirma-
tur & in tali gradu per aliquod tempus adhuc conservatur.
Prior illa periodus incipit post adolescentiæ finem, & durat
usque ad quintum septenarium, seu annum trigessimum quin-
tum, estque illa maxime ætas, quæ æquo Marte agit, atque
tam conservationi sui ipsius, quam speciei propagationi pari
vigore invigilat. Non quidem studet, nec etiam tunc opus
habet Natura, ut corpus in longitudinem ulterius extendat,
quin potius sola ejus cura in eo terminatur, ut in tali statu
conservetur, magisque insimul obfirmetur & conveniens ac
debitum robur membris concilietur, unde etiam plerumque
tunc potius ad obesitatem, quam ulteriorem proceritatem
acquirendam disposita sunt talia subjuncta. Interim omnium
ætatum hæc fere calidissima est, quoniam ob fibrarum muscu-
larium solidam maximeque elasticam texturam, concurrente
insuper agiliori vitæ genere, sanguis ibidem transiens vali-
dissime concutitur, attenuatur & crasis ejus sulphurea exal-
tatur, adeoque Temperamentum Cholericum aut Cholero-
Sanguineum tunc plerumque prædominari observatur; cum-
que sub his circumstantiis pulsus naturaliter sit vehemens, quo
sanguis per arctiora fibrarum interstitia debite progrediatur,
licet hic progressus, ob ejus fluiditatem, alias quoque satis ex-
pedi-

peditus sit, hinc etiam in moralibus actionibus pariter alacres, expediti, vigiles, moræque impatientes sunt, impedimenta ipsi forsitan occurrentia, vigore resarciunt, proposita obstinato animo prosequuntur, ad iracundiam quoque & rixas admodum facile inclinant, quapropter etiam hæc ætas a quibusdam *bellicosa* vocatur, quoniam, teste CICERONE, ad superbiam, rapinas, dissensiones, homicidia, &c. prona & præceps est. Interim tamen etiam, ob insignem animi activitatem & peculiare mentis acumen ad omne fere studiorum genus hæc ætas aptissima est, si nimirum singularis illa in agendo præcipitancia & in eruendo impatientia quodammodo temperata & subjugata est, ne forsitan graviorem intellectus usui injicere queat remoram.

§. XX.

Ætas *consistens* virilis ab anno trigesimo quinto usque ad quadragesimum nonum extenditur, adeoque sextum & septimum sub se comprehendit septenarium, qua de causa etiam quibusdam placuit eandem in duos adhuc dirimere gradus, quorum alter ad sexti, alter vero ad septimi usque septenarii finem sese extenderet; quoniam nempe diversis hisce periodis etiam satis distinctæ & notabiles observantur in corpore alterationes, quarum intuitu etiam hæc cæteroquin levioris momenti subdivisio non prorsus rejicienda esse videtur. Sub *primo* ergo consistentis ætatis gradu communiter subjecta exhibent calorem paulo remissiorem, quam sub adolescentia & vigente ætate, quoniam M. S. antea summe exaltata haud ita diu in eodem statu permanere potest, quin potius, ob seri halitiosi per calorem auctiorem, continuam exhalationem & crassiorum particularum accumulationem, concurrente insimul fibrarum paulo majori soliditate, crassis hujus humoris nunc quodammodo alteratur & paulo spissior redditur, adeoque etiam motus ejus progressivus quodammodo retardatur, qui dein paulo majori cum cura & attentione promovendus & conservandus, habita nimirum prudenti ratione proportionem humoris hujus ad vias, ne nimirum crassiusculus ille, si majori forsitan impetu propellatur, intra angustio-

gustiora fibrarum interstitia obhærescat & periculosas postmodum stases formet. Hinc etiam est, quod sub hac periodo itidem in moralibus consueta antea præcipitantia & animi libertas quodammodo fatiscat atque ad saniolem mentem redeant talia subiecta; inprimis autem in gubernandis affectibus & reprimendis aliis irregularibus motibus potentiora evadant: Vigent enim tunc præcipue tam ingenii, quam iudicii vires, adeoque in Republica litteraria pariter ac civili tales homines plurimum utilitatis præstare possunt, simulque ad obeunda cujusvis generis officia aptissimi censentur, quoniam hocce tempore tam in vitalibus, quam moralibus eisdem ad debitam perfectionem devenisse, vel ex eo haud improbabile est, quod ab ulteriori corporis augmento nunc successive desistere incipiat principium, & abundantem adhuc succum nutritium, qui calore vehementiori non amplius absimitur, in speciales folliculos sub forma pinguedinis deponat, colligat & profuturis usibus asservatum retineat.

§. XXI.

Secundus ætatis consistentis gradus septimum complectitur septenarium, sicque ab anno quadragesimo secundo oritur & cum quadragesimo nono terminatur, hocque tempore, fatiscente successive pristina Naturæ activitate in negotio nutritionis, vires quodammodo imminuuntur & paulatim deficiunt; unde etiam desiderium particularum nutritiarum & affatim in accretionem apponendarum quod *appetitum* vocant, remittit, in respectu ad priores annos, quod etiam desiti observatur, ita tamen ut in tali adhuc gradu remaneat, qualis ad solam nutritionem continuandam sufficit. Somno etiam sub hac periodo magis detrahitur, quoniam ad negotia accretionis vel nutritionis non amplius tantum temporis requiritur, uti sub prioribus ætatibus; plerumque tamen adhuc sufficiens est, ad lassitudinem de die inductam corrigendam & amovendam. Habitus corporis antea laxior & diffusior nunc sensim in strictiorem mutatur, ita tamen, ut robori corporis nihil inde decedat, nec impediat, quo minus labores exantlandi impigre suscipiantur & satis diu continuentur, nisi forsitan

forſitan variis diætæ exceſſibus præmaturam ſenectam ſibi accelerarint adoleſcentes. Non minus etiam vigor mentis per hanc periodum adhuc ſic ſatis conſtat, inprimis autem providum in dirigendis actionibus moderamen exhibent & ad præmeditata conſilia danda ſeſe applicant, ſufficienti teſtimonio, quod ardor juvenilis deferbuerit, & quæ antea flagraverat Cholerica diſpoſitio nunc ad Melancholicam quietem ſe ſucceſſive componere incipiat. In ſequiori quoque ſexu roboris vitalis notabile decrementum demonſtrat privatio nobiliſſimæ facultatis, ſub finem hujus periodi occurrrens, quando completo ſeptimo ſeptenario, fatiſcente ſenſim Naturæ induſtria in proprii corporis nutritione, intentio quoque peregrinum corpus in Utero alendi prorſus ceſſare ſolet, eaque propter, mutata priſtina ſanguinis determinatione, ſuperflua ejus quantitas non amplius verſus Uterum dirigitur, unde dein menſtruus fluxus plenarie deficit & ſubſiſtit, ſimulque perpetua ad concipiendum impotentia, ſeu ſterilitas, poſtmodum invaleſcit.

§. XXII.

Quarta denique ætas, nempe *Senectus*, eam conſtituit annorum periodum, ſub qua, ob ingruentem majorem virium defectum, homo nec ſibi, nec aliis vivere putatur, quaque appropinquantis mortis amaritiem deguſtare incipit, & hæc extenditur a fine ſeptenarii ſeptimi uſque ad mortem tanquam ultimam ejus lineam: Quoniam vero principium corporis noſtri vitale, ſicuti antea in ſtruendo corpore minime ſaltum fecit, ſed hoc ſuum domicilium ſenſim ad illum perfectionis gradum deduxit, quem ſub tertia ætate potiffimum exhibet; ita nunc pariter, ſi modo otium ſibi concedatur, nullam in deſcendendo ab hoc perfectionis cacumine vult præcipitantiam, quin potius pedetentim in conſervando & nutriendo ſuo corpore fatiſcit ac paulatim deſinit: Hinc placidus talis deſcenſus Philoſophis ac ſimul Medicis anſam præbuit, ut hanc Senii periodum modo in duas, nempe *viridem* & *decrepitam ſenectutem*, modo etiam in tres minores, nempe *viridem*, *maturam* & *decrepitam*, adhuc diviſerint. *Viridem* ſeu

erudam, per septenarium octavum non nisi durātem, vocant, in qua quidem virentis roboris indicia adhuc emicant, magis tamen ad declinationem illa vergere & notabiliores mutationes ingruere videntur, dum nempe torpor in laboribus animi & corporis quidem sentitur, qui tamen non impedit muniis præesse; obtusior quidem est acies oculorum, despicere tamen adhuc longe licet; canities insuper capillos hinc & inde pingit, non tamen plenarie obducit. Inprimis autem nutritio segnius succedit & consumpta lente restaurantur, eaque propter fibræ motrices sicciore, rigidiore minusque elasticæ, corpus facile delassatur, viscerum tonus & abinde dependentes actiones debilitantur, ventriculus languidius digerit, motus vitales, speciatim vero sanguinis circulatio & pulsus, tardius succedunt, unde humoris hujus lentor & spissescencia indies crescit, quæ ob arctam pororum aperturam, assiduum & proportionatum pulsus moderamen exigit, cum continua cura & suspitione conjunctum, ne forsitan ob facile oborientes stases, grave quoddam periculum superveniat. Hinc tales senes ad omnia circumspecti, pensitabundi, suspiciosi, minus securi magisque attenti esse solent, eoquē ipso Temperamentum Melancholicum magis magisque invalescere demonstrant: idcirco etiam moderati sunt in actionibus, laboris patientes, assidui, propositi tenaces, taciturnitatis studiosi, in omnibus impedimenta magis, quam facilem successum pertimescentes. Et licet tandem Memoria & Phantasia tunc quodammodo a pristino vigore desciscere videatur, iudicii tamen robore satis exquisito adhuc pollent, & propterea adferenda consilia præmeditata aptissimi censentur, quæ etiam forsitan causa fuit, quod antiqui Melancholiam sedem sapientiæ esse crediderint. Vid. SENECA *Lib. de tranquill. cap. 15.*

§. XXIII.

Sub *senectute matura*, quæ septenarium nonum completitur, prædicta incommoda adhuc magis invalescunt, tonus nempe & elater viscerum ac fibrarum magis magisque frangitur, actiones omnes languescunt, appetitus est imminutus &

& digestio ciborum, ob fractas ventriculi vires ægrius peragitur, adeoque chylus non nisi crudus elaboratur, a quo dein crasis sanguinis jam jam a naturali statu deficiens, magis depravatur, debitamque nutritionem retardando Marasmm lente invalescere permittit, hancque ob causam virium dejectio in dies invalescit, crines magis canescunt, imo cadesunt & prorsus emoriuntur succedente dein calvitie, dentes itidem vacillant & excidunt, omniumque sensuum acumen, ob relaxata organa, paulatim obtunditur. Quoniam etiam insuper, ob crescentem fibrarum siccitatem & sanguinis spissitudinem Temperamentum magis Melancholicum redditur, hinc non solum anxia Naturæ sollicitudo, de præoccupandis stasibus, sed & curæ ac inquietudines morales magis crescunt, ut propterea tristes, morosi, impatientes, pusillanimes, suspicaces & pessima semper timentes, simulque avaritiæ non raro indulgentes deprehendantur, quæ omnia etiam Judicium, quod alias adhuc satis vigeret, eximie corrumpunt, reliquorum autem internorum sensuum vigorem prorsus fere obtundunt.

§. XXIV.

Tandem universum vitæ decursum claudit senectus decrepita, ab anno climacterico magno ad vitæ usque finem durans, omnium sane impotentissima ad exequendas suas functiones, si quidem in ea adest summus corporis languor & morbida debilitas cum animi fastidio insigni ad quaslibet res externas, membra exarescunt, cutis antea extensa & polita rugarum fulcis fit deformis, pinguis musculorum habitus fit strigosus, dentium jam jam perditorum alveoli, detritu magis pereuntes mentum acutum formant, cartilagine ver-tebris dorsi interjacentes duritiem majorem contrahunt, unde hoc incurvatus & priorem flexilitatem amittit, respiratio fit angusta magis, vox tarda, tremula & ob dentium jacturam loquela imperfectior evadit. Similes graviores defectus observantur etiam quoad internos sensus, de quibus, oblitterata Memoria & Phantasia, vix exigua Judicii vis remanet, eaque fere infantilis, præcipue si præmaturo judicii acumine dotati

dotati fuerunt, ac strenuis & assiduis meditationibus nimium quantum illud exercuerunt, hacque ratione, ob flaccidam insuper, sicuti in primis ætatibus, Cerebri consistentiam, puerilis animus in ipsis redire solet, unde recte tunc *Senes bis pueri* dicuntur. De reliquo, quoniam anima ex tot discrimini- bus per vitam ante actam didicit, periculorum atque fallacia- rum plena esse omnia, hinc scrupulose jam examinat omnia, & suspicioni plurimum indulgendo, quod nempe undique ipsi immineant aduersa, etiam undique præsidia & media ad defensionem quærit, hisque intenta tanto magis curas cor- pori sustinendo necessarias perdit. Somno hinc detrahitur, qui vix per paucas horas continuat, silet appetitus, magis adhuc sitis & abinde dependens nutritio, fluida, quæ sangui- nem saltem quodammodo diluerant, nunc plane deficiunt, fibræ carnosæ sibi arctius accumbunt, sanguinis cursus fit lentus magis ac debilis sicque sub plenario Melancholici temperamenti complemento inducitur Marasmus & ab hoc tandem ultimus

Vitæ

F I N I S.

